

# Aschtoh II



**Texscht : Mike Sutter**  
**Musig : Mike Sutter**

**Gäng we ni nöime ire Schlange schtange  
schtang i garantiert ir lätze a  
wär's linggs u rächts scho lengschtens vorwärts gange  
chum i ke Santimeter voraa**

**Vor mir die unmügleschte Gseue  
Schwär vo Begriff und kompliziert  
Wo mit Absicht sech vor mi häre schteue  
Was mini Närve masslos schtrapaziert!**

**I wott zum Bischpiu z' Bsuech zur Tante Röse  
U schtange am Guichet Sibe a  
Mis Billet nach Zollikofe z'löse  
No eine vor mir de chum i dra**

**Dä wott zwöiti Klass nach Brüelisou  
U de via Locarno nach Bergün  
Hauptax samt Ching u Hung u Frou  
I wiiche gschlage us a Schauter nüün**

**Mir läbe – dem Fortschritt sei dank  
Im Zytauter vom Outomat  
Am Bahnhof, ar Tankschteu ir dr Bank  
Die Chischtene si Tag u Nacht parat**

**Doch die – chöit mer säge was dr weit  
Verfüege über irgend ä Sensor  
Wo tschegget we dr Sutter vordra schteit  
Verursachts ä fatale Error**

**D'Sunne schiint – kes Wüwchli trüebt dr Blick  
Ir Nacht hett's ä haube Meter gschneit  
I bi – u das trüebt ä chli mis Glück  
Nid dr einzig wo am Sässulift aschteit**

**Linggs gseht es us aus giengtis gschwing  
Drum schtange ni ganz uss ar Trube i  
I merke gli mou rächts giengt's Bubiring  
u mir schtö nanger linggs ä chli uf d'Schi**